

項部五

○百脉疽

鬼遺云百脉疽腫起環頸項疼痛身體大熱不敢動止帽帽不能食此有大畏恐駭上氣咳嗽其發引耳不可以腫十五日可刺導引不刺導引見血八十日必死

○頸癰

靈樞云發於頸者名曰天疽其癰大而赤黑不急治則熱氣下入淵腋前傷任脉內熏肝肺熏肝肺十餘日而死矣 或問頸上生癰疽何如曰是頸癰也屬

手少陽三焦經鬱火積憤驚惶所致初覺卽隔蒜灸服活命飲加元參桔梗升麻及勝金丹奪命丹汗之壯實者一粒金丹下之老弱者十全大補湯人參養榮湯若潰而不斂煩躁脹滿小便如淋嘔吐者死

一婦頸痛不消與神効瓜蔓散六劑少退更以小柴胡加青皮枳殼貝母數劑痛腫減大半再以四物對小柴胡數劑而平 一人神勞多怒頸腫一塊久而不消諸藥不應予以八珍湯加柴胡香附每日更隔蒜灸數壯日飲遠志酒貳叁盞漸消 一婦月水不行漸熱欬嗽肌體漸瘦胸膈不利頸腫一塊日久不

消令服逍遙散月餘更服八珍湯加牡丹皮香附又
月餘加黃芪白朮兩月餘熱退腫消經行而愈一
人年踰三十每勞心過度頸腫發熱服敗毒散愈盛
用補中益氣湯數貼而消一人因暴怒項下腫痛
胸膈痞悶兼發熱用方脉流氣二劑胸膈利以荊防
敗毒散二劑而熱退肝脉尚弦濇以小柴胡加芎歸
芍藥四劑脉證頓退以散腫潰堅丸一料將平惟一
核不消服遇神仙無比丸貳兩而瘳一兒甫周歲
項患胎毒予俟有膿刺之膿出梔許乳食如常用托
裡藥月餘而愈又一兒患此待膿自出幾至不救

大抵瘡淺宜砭深宜刺使瘀血去於毒聚之始則易消也況小兒氣血又弱膿成不針不砭鮮不斃矣
一人項下患毒膿已成因畏針焮延至胸赤如霞其脉滑數飲食不進月餘不寐甚倦予密針之膿出卽睡覺而思食用托裏散兩月餘而愈又一人患此及時針刺數日而愈一人素虛患此不針潰透頰頰血氣愈虛而死
一婦因怒頸腫後月水不通四肢浮腫小便如淋此血分證也先以椒仁丸數服經行腫消更以六君子湯加柴胡枳殼數劑頸腫亦消矣亦有先因小便不利後身發腫致經水不通名曰水分

宜葶藶丸治之良方云婦人腫滿若先因經水斷絕後致四肢浮腫小便不通名曰血分水化爲血血不通則復化爲水矣宜服椒紅丸

○項中疽

或問頸後腦下發疽何如曰此卽對口瘡也屬督脉陽獨盛氣有餘火炎上而發疽也急服烏金散勝金丹汗之壯實者一粒金丹下之稍遲潰出膿水入風發搖者難治有毒邪壅盛鮮血暴湧而死毒攻心腹膨脹譫語者死此證焮赤腫痛可治若根大精神昏憤卽難治也量表裏虛實而爲汗下內托內消外

用大圍藥箍住中點六灰膏之類破泄其毒不可走
失根脚若欲流兩肩脊者不可療也或云先服追疔
奪命湯二貼後服活血化毒湯

治對口瘡効方用新鮮茄蒂柒箇秤若干重又用鮮
何首烏秤同茄蒂重用水壹鍾半煎服一服出膿
一服收口如無鮮茄蒂首烏乾者亦可但不及鮮
者有力此方輕劑不可以治重病觀者勿泥也

○天柱疽

或問天柱骨上極痒入骨惡心吐逆肩背拘急何如
曰此名天柱疽急隔蒜灸痒止爲度無蒜明灸可治

服活命飲加羌活桔梗烏金散勝金丹選用灸而有
泡者吉無泡者凶服汗劑得汗可治無汗難治若潰
爛神昏嘔噦惡心血不止者死

○疔疽

參耳後

或問頸上兩耳後生疽何如曰此名疔疽初不甚腫
但痛痒不時而出清水漸漸長大如玳瑁斑點者是
也亦名化骨瘡急服八陣散奪命丹活命飲加桔梗
柴胡若過時潰爛日久出骨者大惡之證也此證多
生於積鬱之人七惡多見犯禁者不治

○來喉疽

或問喉之兩旁生疽何如曰此名夾疽屬手少陰心經足太陰脾經足厥陰肝火熱毒上攻而然宜琥珀犀角膏犀角散黃連消毒飲活命飲加元參桔梗黃連潰內者難治虛火上升痰壅飲食不進者死

○結喉癰

靈樞云癰發于嗑中名曰猛疽猛疽不治化爲膿膿不瀉塞咽半日死其化爲膿者瀉則合豕膏冷食三日而已 或問當結喉生癰何如曰是名喉癰又名猛疽以其勢毒猛烈可畏也屬任脉及手太陽手少陰經積熱憂憤所致急宜清熱攻毒用琥珀犀角膏

及黃連消毒飲紫金丹烏金散選用壯實者一粒金丹下之若過時不治潰穿咽嗑者死

○瘰癧馬刀

結核連續者爲瘰癧

形長如蛤者

爲馬刀 一云瘰癧者結核是也或在耳後耳前或在耳下連及頤頤或在頸下連缺盆皆謂之瘰癧或在胸及胸之側或在兩脇皆謂之馬刀手足少陽主之

集驗云夫瘰癧瘡者有風毒熱毒氣毒之異瘰癧結核寒熱之殊其證皆有忿怒氣逆憂思過甚風熱邪氣內搏於肝經蓋怒傷肝肝主筋故令筋縮結畜而腫也其候多生於頸項胸腋之間結聚成核初如豆粒後若梅李累累相連大小無定初覺憎寒壯熱咽

項強痛腫結不消者便當服散腫潰堅湯或五香連翹漏蘆湯之類散之或用牡蠣大黃湯踈利三兩行瘡上可用十香膏之類貼之及諸淋洗敷貼等藥治之庶得消散若不散可用內消丸之類消之或隔蒜灸之仍斷慾息氣薄滋味調理之不然恐日久變生寒熱咳嗽而成勞瘵之疾不可治矣又有馬刀瘡亦生於項腋之間有類瘰癧但初起其狀如馬刀赤色如火燒烙極痛此瘡甚猛宜急治之不然多成危殆也臨證辨之 丹溪云夫瘰癧初發必起於少陽經不守禁戒必延及陽明經大抵食味之厚鬱氣之積

曰毒曰風曰熱皆此二端招引變換須分虛實彼實者固易治自非痛斷厚味與發氣之物雖易亦難殊爲可慮以其屬膽經主決斷有相火而且氣多血少婦人見此若月經行不作寒熱可生稍久轉爲潮熱其證危矣自非斷欲絕慮食淡雖神聖不可治也

戴復菴云瘰癧之病皆血氣壅結根在臟腑多結於頸項之間纍纍大小無定發作寒熱膿血潰爛或此沒而彼起宜於隔宿用米飲調下桂府滑石貳錢鐘動時進黑白散必有物如葡萄肉從小便出至數枚其腫核則愈仍常服四七湯加木香或蘇子降氣湯

其匝頸者俗名蟠蛇癰難治 薛新甫云瘰癧之病

屬三焦肝膽二經怒火風熱血燥或肝腎二經精血
虧損虛火內動或悲怒氣逆憂思過甚風熱邪氣內
搏於肝蓋怒傷肝肝主筋肝受病則筋累累然如貫
珠也其候多生於耳前後項腋間結聚成核初覺憎
寒惡熱咽項強痛若寒熱熾痛者此肝火風熱而氣
病也用小柴胡湯以清肝火并服加味四物湯以養
肝血若寒熱既止而核不消散者此肝經火燥而血
病也用加味逍遙散以清肝火六味地黃丸以生腎
水若腫高而稍軟面色痿黃皮膚壯熱膿已成也可

用針以決之及服托裏之劑若經久不愈或愈而復發膿水淋漓肌體羸瘦者必純補之劑庶可收斂否則變成九瘻內經曰陷脉爲瘻留連肉腠卽此病也外用豆豉餅琥珀膏以驅散寒邪補接陽氣內服補中益氣湯六味丸以滋腎水培肝木健脾土亦有可愈者大抵肝膽部分結核不問大小其脉左關弦緊左尺洪數者乃腎水不能生肝木以致肝火燥而筋攣須用前藥以滋化源是治其本也外臺秘要云肝腎虛熱則生瘻病機云瘰癧不係膏粱丹毒火熱之變因虛勞氣鬱所致止宜補形氣調經脉其瘡自消

散蓋不待汗之下之而已也其不詳脉證經絡受病之異者下之則犯經禁病禁虛虛之禍如指諸掌若脉洪大元氣虛敗爲不治若面眇白爲金尅木亦不治若眼內赤脉貫瞳人見幾條則幾年死使不從本而治妄用伐肝之劑則誤矣蓋伐肝則脾土先傷脾傷則損五臟之源矣可不慎哉 按脉經云人年五六十其脉浮大者痺俠背行苦腸鳴馬刀俠癭者皆爲勞得之可見癰癰之證多起於虛也薛氏之論可爲典要故詳著之

治療次第初覺增寒壯熱咽項強痛腫結不消者以

羌活連翹湯又宜長服消癰丸却以稜針刺破出血
以拔毒湯熱淋洗一日洗五七次針五七次放蟾酥
末少許於針處上以琥珀膏貼之更以內消膏貼之
久久自然而消也如不散者用鐵筒拔毒膏點破次
以下品錠子取去惡肉可作潰瘍治之用十宣散之
類托裏若毒攻心嘔吐者用粉乳托裏散發出毒此
要兼針灸法同施若已潰不愈者宜益氣養榮湯八
物湯加柴胡地骨皮夏枯草香附子貝母多服取効
凡用錠子藥線必用托裏之劑服之 焮赤腫痛脉
沉數者邪氣實也宜泄之以化毒消腫和裏散加減

腫痛憎寒發熱或拘急脉浮數者邪在表也宜散
表以荆防敗毒散加減 因怒結核或腫痛或發熱
者宜疎肝行氣以小柴胡湯加青皮青木香紅花桃
仁 腫硬不潰者宜補氣血以益氣養榮湯 抑鬱
所致者解鬱結調氣血以益氣養榮湯 潰後不斂
者屬氣血俱虛宜大補以益氣養榮湯欠用十全大
補湯加香附子貝母遠志 虛勞所致者宜補之先
以補中益氣湯次以益氣養榮湯加減 因有核潰
而不斂者腐而補之以針頭散腐之以益氣養榮湯
補之 脉實而不斂或不消者下之以羌活連翹湯